

27/10/2003

BN janji tunai hasrat PM tawan Kelantan

KOTA BHARU: Umno dan Barisan Nasional (BN) Kelantan tidak mahu menghampakan hasrat Perdana Menteri, Datuk Seri Dr Mahathir Mohamad dan timbalannya, Datuk Seri Abdullah Ahmad Badawi untuk melihat negeri ini kembali diperintah BN pada pilihan raya umum akan datang.

Sehubungan itu, Pengerusi Badan Perhubungan Umno negeri, Datuk Mustapa Mohamed mengakui kedua-dua pemimpin itu menaruh harapan tinggi bukan saja

kepada Kelantan tetapi juga Terengganu.

"Kita tahu Perdana Menteri (Dr Mahathir) dan Timbalan Perdana Menteri (Abdullah) meletakkan harapan tinggi.

"Jadi, kita akan bekerja bersungguh-sungguh dan tidak akan menghampakan

harapan mereka," katanya kepada pemberita selepas mempengerusikan mesyuarat Badan Perhubungan Umno negeri, di pejabat Umno negeri, di sini, semalam.

Beliau berkata demikian ketika ditanya mengenai Dr Mahathir yang akan bersara Jumaat ini sentiasa melihat BN boleh menang di Kelantan dan kembali memerintah negeri ini.

Mustapa yang juga Pengarah Eksekutif Majlis Tindakan Ekonomi Negara (MTEN) berkata, dalam keadaan sekarang Pas dilihat tidak mempunyai isu besar dan hanya memainkan isu lama berkaitan agama yang mereka sendiri gagal laksanakan di negeri ini.

Katanya, dengan situasi itu, Umno dan BN Kelantan percaya boleh membuat keputusan yang baik dalam pilihan raya umum kali ini.

"Banyak isu peringkat negeri boleh kita bangkitkan (kelemahan Pas) sekarang dan memantapkan lagi perpaduan dengan sokongan rakyat semakin meningkat.

"Nampaknya ada tanda-tanda semakin baik (untuk menang) dan kalau ini berterusan maka kita akan dapat hadiahkan (kemenangan BN) di Kelantan kepada Perdana Menteri," katanya.

Ditanya Umno ketika ini dikatakan sudah mampu mencapai kemenangan dengan majoriti mudah, beliau berkata, berdasarkan semangat baru rakyat, ia menjadi petanda seperti diharapkan.

Katanya, beliau banyak menghadiri majlis kemasukan orang Pas ke dalam Umno di negeri ini dan perkembangan itu antara petanda baik untuk BN mencapai kemenangan.

"Saya lihat banyak kemajuan dan ada juga orang Pas jumpa saya setuju menyokong (BN) tetapi tidak secara terbuka kerana bimbang mereka ditekan (Pas)," katanya.